



O Volapükaf lens Valöpo!

Jiflen Fransänik epenof obe brefabüiko, das pädan zifila Litzelstetten, kö el Johann Martin Schleyer äbinom pädan dü yels 1875 jü 1885, egivülom kloki ad stimön mebi Datuvala. Äviloy sagön vödis anik in Volapük dü fomed. Ekö ons : "Nemü pädan obsik, vilob danön oli demü legivot at nobaladälik. Binonös bened gretik e dugonös obis lestime dibikum Kiläta Saludik. @

As redakan Sirkulapenäda, vilob ai бүкөн dinis, kels i plitons, i yufons reidanis. Äs sevols osi, ebükob jünü migi dinas, kels stäänikons de vödeims fasilik jü lartügs e koneds fikulikums. Ab etuvob-li leigaveti verätik? Ad yufön obi in tef at, vilols-li begö! gespikön säkis fol sököl?

1. Ven getol Sirkulapenädi, dini kinik reidol-li balido?
2. Valemo бүкөb konedi lunik, kel dulon dü muls anik. Juitol-li konedi somik?
3. Semikna бүкөb rätis alsotik. Steifülo-l- ad dunön atis, u tuvöl-li onis tu fikulikis?
4. Cedol-li, das dabinson nesaid dinas nelunik; samo, cögs, saits?

Äs esagob, ceds olsik tefü ninäd Sirkulapenäda oyufons obi ad dünön olis ba gudikumo. Ab gudiküno obinos, if osedolsös obe buükamis olas tefü ninäd gasedila obas; täno olabob geidalienis fümik ad sökön!

Valikosi Gudikün Oles ed Olikanes

sedom



GESPIKS DIFIK NETIK

Jipuls yunik kil, sevabo : Lamerikānan, Linglānan e Fransānan
ālisitofs call as jiyufani patik* ko flitavakompenāt famik, kel āgivon
ofes primātablufis*.

Bluf baī ātefon lemeki sludas vifik, e jipuls kil pāsākofs fa
xaman : "Niludolsös, das flitols love nisuls semik fagoseatik*, e das
flitöm olsik muton ledunön ditretajolami*. Binols soaliks in
savabotil* e gubols lü nisul smalik. Su nisul logols grupi melanas,
kels lülogoms lükömi olsik. Kisi dunolsöv-li?"

Nentiko jilamerikānan āgespikof: "Ob öfövböv gubami lü nisul
votik."

Jipul Linglānik, posā ātikof boso. āsludof: "Ob öfövböv
gubami lü nisul votik, kiöp ösākoböv bespiki ko cif us."

Ab jipul Fransānik āsagof nosi, ed ājīnof bluvön*.

"Suemol-li sāki?" āsākom xaman.

"Lesiö!" āgespikof, "ab kis binon-li sākād?"

→ → → → → → → → → → → → → →

BLUVÖN	to be perplexed	JIYUFANI PATIK	a stewardess
DITRETAJOLAM	an emergency landing	PRIMÄTABLUF	an Initiative test
FAGOSEATIK	remote	SAYABOTIL	a lifeboat

→ → → → → → → → → → → → → →

I mans sapik pökoms

TÄVAVENTÜR IN KURDÄN (III)
FA DOKAN KARL MAY

"O söl," äsagom poso, äsuilogedöl stimiküno, "sevob nosi dö atos. Konfidol-li obi verato?"

"Si, lefuliko."

"Mög dabinon, das riskädikol, bi el *Jeiq* löfom nefiedī, plu ka fiedi. Polols len ols vafis völadik ed i dinis votik, kels is kanons ni palogön, ni paremön ai. Du äbinols lotans oma, no ädalom tifön seimosi oles, ab nu kanom dunön alseimikosi, kelosi vilom."

"Ed odunom ba kisi-li?"

"Ba enunom elī *Jeiq* de *Zibari*, das onesiomös lotidiäli obes, e bofikans odiloms bevü oks utosi, kelosi labols ko ols."

"In jenet at el *Jeiq* ola no egetävom ini vilag, ab sukom kläno obis."

"Niludob atosī. Odunol kisi-li?"

"Osuädob obi, va niludobs verato, ed if si, ogesedob oli."

"*Qodiè* (O būdal), no odunol atosī!"

"Dönu odunob osi. El *Jeiq* binom söl ola; no dalol dunön seimosi, kelos binos ta vil omik."

"No obinom fovo söl obik. Hetob Kurdänanis at. Ya lunüpo ävilob lüvön omis e golön vesüdio, ab no oleadomsöv golön obi."

"E kis ojenos-li tefü olikans?"

"O söl, labob ni fati, ni moti, ni cili, ni vomi; dalabob nosi pläamü utos, kelosi logol is len ob - jevod duton lü el *Jeiq*. Vilob golön ini *Bädri* lü el *Mir Jeiq Qan*. Dälolös obi ad dugädön oli, o *Qodiè*, ed odanob oli dü ret

lifa obik!"

"Sevob, das patölatol fa el Jeiq ti äs slaf, e das senol oli as neläbikün; ab okanob sludön dö vip olik latikumo. Kanol-li svimön?"

"Si, o söl! Sötob-li blinön eli *kelek* (= floted pemeköl me hikaparaskins pesubladöl) lü flan at?"

"No; svimolsöd nu lü jol votik, e stebolsöd us po saligabimüls. Vüo ob ogemonitob ad logön, va el Jeiq sukom obis. Usiö!"

Bofikans ädugoms jevodis ini vat ed ob ägemonitob. Troto ärivob geiloti nilikün, de kel ikömob ed isao dido älogob eli *Melef* ko *Jirvan*-Kurdänans valik, kels anu ägegölädoms ini gur löpü stanöp oba. Izivegoms ad blibön sefiks tefü obs. If id ob ävilob blibön sefik tefü oms, no ämutob nespälön timili. Vifiküno ämonitob dönu lü flum e, ven hijevod obik ägolom ini vat, geiliko ätovob vafis ad jelön onis ta luim.

"*Qodiè*," el ceside ävokädom obi, "sökoms-li obis?"

"Si."

"So - riskädikobs."

"Liomödotik"

"Suilogedolös isio!"

Äjonom geilemi, kel su flan at ämiedon flumafälid di *Zab*. Älogob trupi monitanas ba kildegas, kels usao äkoskömoms obis.

"Binoms-li Zibar-Kurdänans?"

"Si, o söl!"

"Niludob, das els *Jirvani* bofik nog no ikanoms rivön leseatöpi ela *Zibar-Jeiq* nilikün."

"Ba fädo etuvoms kriganatrupi at. Elogoy ya obis. Büdol kisi-li, o söl?"

"Sevol-li vegi sefik love *Tura-Gara*-bels jüi fimod *Akra* u lü fons *Akra-fluma*?"

"Si! Kisi vilol-li dunön us?"

"Pakolkömob us fa flens. If ogolobs isio deto, niludob,, das okolkömob omis."

"No kanobs kolkömön omis, bi lubel us pazüon me klífs, kels rivons vati. Jevod no kanon xänön onis."

"Benö! Okosmonitobs omis!"

"Ed odunol-li kisi poso?"

"Ologobs utosi, kelosi mutobs dunön täno. In jenet alik, ol obinolöd püdik. Binol fe dugan obas, ab no binol neflen omas."

"O söl, bi sevob, das dalabol eli *Melek-Taus*, no binob fūmo flen omas. Okomipol ko ol, if ozesüdos."

"No dālob, das okomipol. Logob, das binol man gidik, ab neif ola no kanon jonidön pro obs."

"Givolös vafi olik semik obe!"

"No sevol, vio vafs at pagebons."

"Dunolös utosi, kelosi ovilol; ab ob yulob lo saludöp ela *Adi*, das no olüvob flani olik!"

El *ceside* gidik äbinom fedan verno dalestimik to vöds brefobüiko pesagöls fa ob e to neif balik.

VI.47.2002

ESEVOLS-LI ATOSI ?

KRISID KLIMATIK

Vamot talaglöpa oglofon ti me grads mäl ma el "Celsius" dü yels tum okömöls. Topäds Nolüdapovik me glad petegöls enemödikons ai plu me 10 jü 15% sis yels luldeg, e melanivät emödikon me zimmets teldeg. Läns lövik, samo : Nedän e Bangladej riskädikons, bi melanivät osüikon me zimmets nog foldegss vata.

SMÖK PEPROIBÖL

Zif Hongkong ba obinon zif primik vola ad proibön smöki valöpo in tops notidik if primät reiganeffa plöpon. If si, te smök podalon in doms privatik.

DEL IT - FÖFIO E PÖDIO!

Logolsös yeli : 2002. Binon leigik if föfio, i pödio! Yel soik okömöl obinon yel : 2112. Ab nesuvikum binon dät : 20-02-2002. (= tü fdel teldegid febula, yela 2002). Binon dientifik ma lüods bofik. Odabinons te fol dätas somik, sevabo: II-II-III, 21-12-2112 e 30-03-3003.

í í

CEDS TEL

Miedet oba dugana binon utan, kel sevon lio süadükön menis ad dunön utosi, kelosi no vilons dunön, u ad dunön utosi, kelos binons tu trögiks ad dunön - e ad plidön osi.

(Harry S. Truman)

Mens blamons ai dinädís okas sekü stad oksik. No kredob mö dinäds. Mens, kels plöpons in vol at binons utans, kels sukons dinädís, kelis vilons, ed if no kanons tuvön onis, tån jafons onis.

(George Bernard Shaw)

TUVEDOTS RÄTILAS MAYULA

1. "D". Spad tonata in padül telid ai binon ot löpü tonat in padül balid, äs tonat in padül kild binon disü tonat in padül balid. Sekü atos, dabinons tonats fol bevü els "N" ed el "I" (löpo) e tonats fol bevü els "D" ed el "I" (diso).

2. Noatädans binons : Mozart, Strauss e Verdi. Jiel Salome no binof noatädan.

3. "lä". Pidob vemo, das tuvedot at no äbinon lölöfiko verätik. Liedo no dabinon vöd "blä" in Volapük, do dabinon vöd "läg". Ye tuvedot finik binon "bläg" (kel binon nevietl) Pidö dönull

4. Zifs valik binons cifazifs, pläamü Bonn - klu zif at no leduton lisede.

5. "6". Kobonumolsöd nümis tipotas lunikas sagitas e näedolsöd kobonumi at de nümis tipotas brefikas sagitas.

□ □ □ □ □ □ □ □ □ □ □ □ □ □ □ □

MUIF

(Fa hiel H. B. Walker)

Alan labon vödi somik : Linglänans sagon "worry," Deutänans sagon "Kummer," Fransänans sagon "souci," Spanyänans sagon : "cuidado."

Kanol betikön säkädis olik, u kanol muifön tefü ons, e dabinon dif gretik bevü dins tel at. Muif binon tik, kel evenenikon. Binon musig neplitik, kel fövon ai, e kel neai labon ni sömitamapüni, ni kludi. Tik ye bejafon säkädis e lükömon lü kluds e sluds. Ven muifol, betikol nen fin dini ot, e finikol kuratiko in top ot, kiöpo eprimol. Tik votaflano progedon ai de top lü top; muif blebon nenmufik. Säkäd lifa binon lio votükön muifi ad tik, e dremäl ad dunots jafik.